

Kertas kerja dimajukan dan dibentangkan di Seminar Internasional Pertemuan Linguistik Utara-6,
Medan
Universiti Sumatera Utara & Balai Bahasa, Medan
2-3 Mac 2009
Hotel Madani, Medan

Unsur Kiasan dalam Wacana Khutbah Jumaat di Malaysia

Hamidah Abdul Wahab
Wan Robiah Meor Osman

Pensyarah
Pusat Pengajian Bahasa, Universiti Malaysia Sarawak
94300 Kota Samarahan, Sarawak
Tel: +6082-581734/1680/1762
Faks: +6082-581781

e-mel: awhamidah@cls.unimas.my/ mowrobiah@cls.unimas.my

Abstrak

Dewasa ini penyebaran dakwah Islam tidak lagi terhad di institusi keagamaan seperti masjid dan surau, tetapi telah disebar luas ke serata pelosok dunia melalui kecanggihan teknologi maklumat. Di Malaysia, wacana khutbah Jumaat yang disampaikan saban minggu di masjid kini mudah diakses umum melalui laman sesawang yang dibangunkan oleh Majlis Agama Islam Negeri. Usaha dan inisiatif institusi agama ini memberi manfaat kepada masyarakat umum mengenai kepentingan ilmu pengetahuan Islam. Justeru, makalah ini akan meneliti unsur kiasan yang terdapat dalam wacana khutbah Jumaat yang dipaparkan secara atas talian. Kajian ini akan memanfaatkan Ilmu Mengarang Melayu (Zainal Abidin Ahmad, 2002). Wacana ini penting dikaji untuk memperlihatkan penggunaan gaya bahasa yang menjadi medium penyampaian maklumat oleh pihak berwajib kepada masyarakat.

Pendahuluan

Islam merupakan agama yang syumul; menyeluruh dalam semua aspek kehidupan manusia. Setiap elemen yang ditekankan dalam agama suci ini secara total dihubungkan dengan keperibadian Rasulullah S.A.W., insan mulia yang diutuskan untuk memimpin manusia ke jalan yang diberkati dan diredai Allah S.W.T. Dalam pelaksanaan dakwah Islamiah, Rasulullah giat menyampaikan khutbah, menyeru umat secara keseluruhannya berpegang teguh kepada tali Allah, melaksanakan suruhan Allah dan meninggalkan segala larangan-Nya. Dalam khutbah terakhir baginda pada 9 Zulhijjah Tahun 10 Hijrah di Lembah Uranah, Arafah, baginda menyebut beberapa peringatan penting tentang keperluan membuat kebaikan dan bertingkah laku sopan terhadap sesama manusia, menjalankan perniagaan berlandaskan hukum Islam dan mengelakkan riba, serta menunaikan sembahyang, puasa, zakat, dan haji bagi yang mampu. Baginda juga menyelitkan nasihat dan seruan agar semua umat manusia tetap mengikut landasan kebenaran serta harus berpaksikan al-Quran dan Sunnah untuk menjamin kesejahteraan dunia dan akhirat.